



Nr. 4 2022/23

Part generala

Instrucziun da nudar

Las recumandaziuns concernent l'instrucziun la surveglianza da nudar per persunas d'instrucziun da la scola populara èn vegnidus messas ord vigur. Sin la pagina d'internet dal Uffizi per la scola populara ed il sport (USS) pon ins chattar da nov ils puncts menziunads en il plan d'instrucziun 21 ed en las explicaziuns tar ils uraris.

Ulteriuras infurmaziuns



ChatGPT e scola

La publicaziun d'ina versiun da test dal IA-Chatbot ChatGPT il decembre 2022 ha manà ad in hipe en medias socialas ed en meds da massa. Savens vegn er fatga la dumonda, tge consequenzas che generaturs artifizials d'intelligenza sco ChatGPT han per la scola. La professura «digitalisaziun e furmaziun» da la scola auta da pedagogia da Sviz (SAP) è s'occupada pli detagliadament cun la tematica ed ha rendi accessibla publicamain las constataziuns.

Constataziuns tar ChatGPT e scola



Material supplementar per New World 3-5

Cun la scola auta da pedagogia dal Grischun (SAPGR) ha l'USS prolungà il contract da service da la plattaforma «New World». Las persunas d'instrucziun chattan là vinavant material supplementar tar ils meds d'instrucziun «New World 3-5». I sa chattan tar mintga unitad: Additional and differentiating teaching material, Games and Songs, Grammar, Sample test exercis, vocabulary

En il Moodle chattais Vus la plattaforma da barat «New World» en il laboratori sut «Meine Kurse».

Per obtegnair access sin moodle è in conto da "Switch Edu-ID" necessari. Switch è ina fundaziun che porscha servetschs dad IT per las scolas autas svizras.

Dumondas tar moodle e la plattaforma da barat



Video da declaraziun "Moodle"



Gruppas accumpagnantas digitalisaziun

Las trais gruppas accumpagnantas digitalisaziun, che consistan da persunas d'instrucziun da tut ils stgalims e da tut las regiuns linguisticas dal chantun, han gî mintgamai duas sesidas dapi l'entschatta da l'onn da scola 2022/23. Suenter in'emprima vasta discussiun dals temas lavuran las commembraas ed ils commembers actualmain prioritarmain vi da las cumpetenzas d'applicaziun. Per l'entschatta da l'onn da scola 2023/24 duain esser avant maun ils emprims resultats per sustegnair l'instrucziun.

Tge èn cumpetenzas d'applicaziun?



Gruppa accumpagnanta talian primara

La gruppa accumpagnanta talian ha publitgà per ils 31 da schaner 2023 il stadi intermediar il pli actual.

Stadi intermediar talian primara



Barat da persunas d'instrucziun cun la scola svizra da Milaun

Il chantun Grischun è il chantun da patrunadi da la scola svizra a Milaun. Sut la direcziun d'educationsuisse e Movetia han persunas d'instrucziun dal Grischun la pussaivladad da sa participar l'atun 2023 ad in job-shadowing a la scola

svizra a Milaun.

Il project sa drizza a persunas d'instrucziun ed a manadras e manaders da scola ch'en interessads da schlaxgiar lur orizont, prender ina invista en in auter sistem da scola e reflectar cun persunas d'instrucziun al lieu davart novas realitads d'instrucziun.

Temp: 16–20 october 2023.

Custs: 250.00 francs per persuna.

Annunzia: cun il formular fin il pli tard als 24 avrigl 2023 direct tar la manadra dal project, Margret Scherrer (mscherrer@gmx.ch).

Attenziun: las plazzas èn limitadas.

[Infurmaziuns "Job-Shadowing Milaun"](#)

[Annunzia \(formular\)](#)



Agid per l'instrucziun "Luchs-Wolf-Bär"

La Pro Natura possibilitescha cun ses agid d'instrucziun "Luchs-Wolf-Bär, die grossen drei sind zurück" a las scolaras ed als scolars d'emprender ad enconuscher la moda da viver da noss trais gronds animals da rapina. Iis uffants emprendan, pertge ch'ils rapinaders returnan, tge basegns ch'els han, tge rolla ch'els giogan en il sistem ecologic e tge che lur derasaziun signifitga per ils umans. En quest connex vegnan tematisads er ils conflicts, las mesiras necessarias e differents puncs da vista. En il senn da la furmaziun per in svilup persistent (FSP) po vegnir dà l'importanza necessaria a la midada da la perspectiva ed a la furmaziun d'in atgna opiniun.

"Luchs – Wolf – Bär, die grossen Drei sind zurück"



Giudiment u dependenza?

«Jau pudess zoccar mintga di», «Ve, nus baivan anc ina!» – Tuttina, sch'i sa tracta da gieus da computer u da consum d'alcohol: la toleranza sociala da talas remartgas è auta ed il ristg correspondent vegn savens sconuschì. In dossier da temas dad education21 cun il titel «Genuss oder Sucht?» porscha differents access per approfundar cun scolaras e scolars il process dal consum controllà e na controllà sco era per discutar en quest connex la responsabladad dal singul e da la societat.

[Dossier tematic "Genuss oder Sucht"](#)



Tschertga d'in temp da pausa - CURSOintensiv

Il modul CURSO intensiv da la scola auta da pedagogia da Son Gagl che dura 6 fin 10 emnas è adattà per persunas d'instrucziun ch'en en tschertga d'in temp da pausa e che vulan sa deditgar al management da sasez. Là dai era bler temp sa recrear, per rir e per emprender ad enconuscher insatge nov. L'accumpagnament professiunal dals manaders dals curs possibilitescha da sa fatschentlar cun novs puncs da vistas en la professiun e la vita privata e rinforza la personalitat.

[Infurmaziuns tar CURSOintensiv](#)



Register dals meds d'instrucziun 2023/24

Il register dals meds d'instrucziun vegn approvà e publitgà mintg'onn da la regenza. En quella èn enumerads ils meds d'instrucziun obligatorics e recumandads per las scolas popularas dal Grischun.

[Register meds d'instrucziun](#)



Midament persunal en l'inspecturat da scola

Per il 1. da schaner 2024 surpiglia Philipp Hugentobler che lavura dapi l'onn 2019 sco inspectur da scola en il district da la Plessur-Grischun central, la direcziun da l'inspecturat chantunal da scola dad Andrea Caviezel. Nus gratulain cordialmain per sia elecziun!

Cordials salids

Chantal Marti-Müller
Manadra USS

Andrea Caviezel
Manader inspecturat da scola

Part regiunala

Termins

Giudicament d'admissiun tenor protesta

Decisiun d'assegnaziun definitiva: 12 avrigl 2023
Examen chantunal d'assegnaziun: 30/31 matg 2023

Nus supplitgain urgentamain las persunas d'instrucziun da las 6. classas da na planisar durant quests dus dis naginas occurrentzas da scola.

Occurrenza da barat ERC

7 zercladur 2023, aula da la scola Giacometti a Cuira.

Occurrenza d'infurmaziun per cussegls da scola

L'occurrenza d'infurmaziun per cussegls da scola che era prevesida pels 6 zercladur 2023 n'ha betg lieu questa primavaira. Il termin stat a libra disposiziun.

Cordials salids

team d'inspecturat Plessur – Grischun central
Christina Nigg (manadra da district), Jachen Andri Buchli,
Daniela Zanelli, Philipp Hugentobler ed Elisabeth Caluori
(secretariat)

